

आकाशवाणी

खास-खास खबरां:-

- लोकसभा नै विकसित भारत-रोजगार ते आजीविका गारंटी मिशन ग्रामीण – विकसित भारत ग्रामीण विकास विधेयक-“जी राम जी -2025” पारित करी दिता ऐ।
- प्रधानमंत्री नरेन्द्र मोदी होर अज्ज नमीं दिल्ली च विश्व सेहत संगठन- डब्ल्यू.एच.ओ दे रिवायती चिकित्सा पर दूए वैश्विक शिखर सम्मेलन दे समापन समारोह गी सम्बोधित करडन।
- रेलवे क्रिसमस ते नमे साल दौरान यात्रियों दी सुविधा आस्तै नौ ज़ोन च 138 विशेष रेलगाडियां चलाग।
- सिंगापुर च इलाज दौरान छात्र नेता उस्मान हादी दी मौत मगरा बांग्लादेश च हिंसा भड़की गई ऐ।
- एशिया कप क्रिकेट अंडर 19-दे सेमीफाइनल च अज्ज भारत दा मुकाबला श्रीलंका कन्नै होग।

<><><><><><>

G RAM G Bill

लोकसभा नै विकसित भारत – रोजगार ते आजीविका गारंटीन मिशन विकसित भारत ग्रामीण विकास : ग्रामीण-विधेयक“जी-जी-राम-2025” पारित करी दिता ऐ। एह विधेयक, 20 बरे पराने महात्मा गांधी राष्ट्रीय ग्रामीण रोजगार गारंटी अधिनियममनरेगा दी थाहर लैग। विधेयक दा मकसद विकसित भारत- 2047 दे राष्ट्रीय दृष्टिकोण मूजब ग्रामीण विकास ढांचा कायम करना ऐ। इस विधेयक तैहत, हर माली बरे च हर ग्रामीण परोआर गी इक सौ 25 दिनें दी मजदूरी रोजगार दी वैधानिक गारंटी प्रदान कीती जाग। नमें विधेयक दा मकसद श्रमिकें गी मते कम्म दिनें दी गारंटी बेहतर मजदूरी ते सुरक्षा प्रदान करना ऐ। मनरेगा दे तैहत फिलहाल इक माली बरें च 100 दिन दे कम्म दी गारंटी दिती जन्दी ऐ, उत्थें गी नमें विधेयक च हर बरे 125 दिन दा रोजगार थ्होग। एह विकसित भारत दी परिकल्पना दे मूजब ग्रामीण विकास दी गति गी होर बढ़ावा देग। कन्नै गै रोजगार दे मते मौके प्रदान करिए ग्रामीण परिवारें गी सशक्त बनाग। जेकर 15 दिन दे अन्दर अन्दर रोजगार उपलब्ध नेई कराया जन्दा ऐ, तां विधायक च बेरोजगारी भत्ता देने दा बी प्रावधान ऐ।

<><><><><><>

Shanti Bill

परमाणु ऊर्जा विभाग मंत्री जितेंद्र सिंह होरें कल राज्यसभा च परमाणु ऊर्जा दे स्थायी इस्तेमाल ते उन्नति शांति विधेयक-2025 पेश कीता। लोकसभा नै पैहले गै इस विधेयक गी संशोधन कन्नै पारित करी दिते दा ऐ।

शांति विधेयक दा मकसद देशवासियें दे कल्याण आस्तै परमाणु ऊर्जा दा विकास करना ऐ। इसदा मकसद इसदे सुरक्षित इस्तेमाल आस्तै इक मजबूत नियामक ढांचा प्रदान करना ऐ। इस विधेयक राए परमाणु ऊर्जा नियामक बोर्ड दे गठन ते परमाणु ऊर्जा निवारण सलाहकार परिषद दी स्थापना कीती जाई सकौगा। एहू विधेयक परमाणु हादसे दी स्थिति च केंद्र सरकार दी जवाबदेही तय करने दा भी प्रावधान करदा ऐ। केंद्र सरकार नै विधेयक तैहत अपनी जवाबदेही गी पूरा करने दे मकसद कन्नै परमाणु जवाबदेही कोष कायम कीता ऐ।



PM- WHO

प्रधानमंत्री नरेन्द्र मोदी हो'र अज्ज नमी दिल्ली च विश्व सेहत संगठन- डब्ल्यू.एच.ओ दे रिवायती चिकित्सा पर दूए वैश्विक शिखर सम्मेलन दे समापन समारोह गी सम्बोधित करडन। इस मौके पर प्रधानमंत्री आयुष क्षेत्र आस्तै प्रमुख डिजिटल पोर्टल, माई आयुष इंटीग्रेटेड सर्विसेज पोर्टल सनें केई महत्वपूर्ण पैहलें दी शुरुआत करडन। एदे इलावा मोदी हो'र आयुष मार्क दी बी शुरुआत करडन- जिसी आयुष उत्पादें ते सेवाएं दी गुणवत्ता आस्तै वैश्विक मानक दे तौर पर परिकल्पित कीता गया ऐ। श्री मोदी हो'र कार्यक्रम दौरान योग- सिखलाई पर डब्ल्यू.एच.ओ दी रिपोर्ट ते आयुष मंत्रालय दे 11 बरे दे बदलाव पर इक किताब दा बी विमोचन करडन। श्री मोदी हो'र अश्वगंधा पर स्मारक डाक टिकट जारी करडन। श्री मोदी बरे 2021 सोयां 2025 दौरान योग दे संवर्धन ते विकास च योगदान आस्तै प्रधानमंत्री पुरस्कार हासिल करने आहलें गी सम्मानित करडन। प्रधानमंत्री रिवायती चिकित्सा खोज आहली थाहर दा बी दौरा करडन। एहू शिखर सम्मेलन डब्ल्यू.एच.ओ. ते आयुष मंत्रालय आस्सेआ सांझै तौर पर नमीं दिल्ली दे भारत मंडपम च आयोजित कीता जा'रदा ऐ। सम्मेलन च वैश्विक नेताएं, नीति निर्माताएं, साईसदानें, चिकित्सकें ते केई प्रमुख प्रतिनिधियें बशकार स्वास्थ्य प्रणालियें गी बढ़ावा देने पर विचार-विमर्श होआ।



PM- Oman

प्रधानमंत्री नरेन्द्र मोदीहो'रें कल ओमान दी अपनी दो-दिन दी यात्रा सम्पन्न करी लैती। उन्दी एहू यात्रा दोनै देशें बशकार राजनयिक संबंधें दी स्थापना दी 70 मीं बरे गंड दे मौके पर आयोजित होई ही। ओमान दे सुल्तान हैसम बिन तारिक हुन्दे कन्ने प्रधानमंत्री मोदी हुन्दी मलाटी कन्नै सदियें पुराने आपसी सरबंधें गी मजबूती थ्होई- तोआई इसदे कन्नै उत्थे रवा'रदे भारतीय प्रवासियें गी बी खुशी हासिल होई। दौ'नें पक्खें भारतओमान स-रबंधें दी उत्कृष्ट स्थिति पर संदोख जाहिर कीता ते इसी इक बहुआयामी महत्व दी सांझेदारी दस्सेआ।



Special Train

रेलवे क्रिसमस ते नमे साल दौरान यात्रियें दी सुविधा आस्तै नौ- ज़ोन च 138 विशेष रेलगाडियां चलाग। रेलवे दी योजना मूजब 650 दौरे प्रस्तावित ते मंज़ूर कीते गए न। रेल मंत्रालय नै दस्सेआ ऐ जे पश्चिमी रेलवे सबने थ्वा ज़्यादा 26, मध्य रेलवे 18- जिसलै'कि दक्षिण मध्य रेलवे बी 26 गड्डियां चला' रदा ऐ। दक्षिण पूर्व मध्य रेलवे इस दौरान त्योहारें च यात्रियें दी सुविधा आस्तै 12 रेलगाडियां चला'रदा ऐ। मंत्रालय नै आक्खेआ ऐ जे खास सेवाएं कन्नै रेलवे यात्रियें गी आराम ते सुविधा देआ' रदा ऐ- जेदे कन्नै यात्रियें गी बगैर परेशानी दे क्रिसमस ते नमां साल मनाने च मदद थ्होग।



Bangladesh Violence

सिंगापुर च इलाज दौरान छात्र नेता उस्मान हादी दी मौत मगरा बांग्लादेश च हिंसा भड़की गई ऐ। हादी गी पिच्छले हफ्ते ढाका च नकाबपोश हमलावरें गोली मारी दिती ही ते कल सिंगापुर च इलाज दौरान उंदी मौत होई गई। उंदी मौत दी खबर फैलने कन्नै सैकड़ों बह्दे समर्थक राजधानी दे इक चौक पर विरोध प्रदर्शन करन लगी पए। प्रदर्शनकारियें बांग्लादेश दे मन्ने-परमन्ने दे अखबारें द डेली स्टार ते प्रोथोम अली दे दफ्तरें च तोड़फोड़ कीती ते इक इमारत च अग्न लाई दिती। दमकल-कर्मियें इमारत दे अन्दर फंसे दे पत्रकारें गी बचाया ते मौके पर सेना तैनात कीती गई। प्रदर्शनकारियें चट्टोग्राम च भारत दे सहायक उच्चायुक्त दे घर पर बी हमला कीता- जिस'करी राजनयिक परिसरें दी सुरक्षा गी लेईऐ गंभीर चिंता पैदा होई गई ऐ। पुलिस नै आक्खेआ जे हमले दे सिलसिले च कैंई लोकें गी हिरासत च लैता गेआ ऐ। मुकामी मीडिया नै दस्सेआ ऐ जे इलाके च तनाव बने दा ऐ।



Kirti Vardhan Singh

केन्द्रीय पर्यावरण- वन ते जलवायु बदलाव सरबन्धी राज्यमंत्री कीर्ति वर्धन सिंह होरें जानकारी दिती ऐ जे मुख्य दा वन ते वृक्ष आवरण 8 लख 27 ज्हार 356 वर्ग किलोमीटर थमां मता ऐ। एह मुख्य दे भौगोलिक क्षेत्रफल दा 25 इशारिया इक-7 फीसद ऐ। राज्यसभा च इक सोआलै दे लिखित परते च उनें दस्सेया जे नमीं भारत वन स्थिति रिपोर्ट –ISFR 2023 मुजब 2021 च कीते गेदे पिच्छले आकलन दी तुलना च मुख्य दे कुल वन ते वृक्ष आवरण च लगभग इक ज्हार 446 वर्ग किलोमीटर दा बाढ़ा होआ ऐ। सिंह होरें आखेया जे केन्द्र सरकार दी बक्ख-बक्ख योजनाएं ते कार्यक्रमें राएं सरकार राज्यें ते केन्द्र शासत प्रदेशें गी मुख्य च जंगलें दे संरक्षण- संवर्धन ते प्रबंधन सनें वन क्षेत्र बढाने आस्तै तकनीकी ते माली सहायता प्रधान करदी ऐ।

इसदे च राष्ट्रीय हरित भारत मिशन- वन अग्नि निवारण ते प्रबंधन योजना- नगर वन योजना ते वन्य जीव आवासों दा एकीकृत विकास शामिल ऐ। उनें एह बी दस्सेया जे मुख्य भरै च बूहटे लाने सरबन्धी गतिविधियें गी बढ़ावा देने आस्तै “एक पैड़ मां के नाम” कन्नै वृक्षारोपण अभियान बी शुरू कीता गया ऐ। इस अभियान नै बड्डे पैमाने पर बूहटे लाने च योगदान दिता ऐ।

<><><><><><>

Prez- Conference

राष्ट्रपति द्रौपदी मुर्मू होर अज्ज बड्डलै हैदराबाद च रियासती लोक सेवा आयोग दे अध्यक्षें दे दंडु दिनें दे राष्ट्रीय सम्मेलन दा उदघाटन करगंन। इस सम्मेलन च रियासतें दे पी.एस.सी. दे अध्यक्ष ते मुख्य भरै दे सीनियर अधिकारी हिस्सा लैगंन। तेलंगाना दे राज्यपाल जिष्णु देव वर्मा- मुख्यमंत्री रेवंत रेड्डी ते यू.पी.एस.सी. दे चेयरमैन अजय कुमार होर बी उत्थे मौजूद रौहगंन। तेलंगाना लोक सेवा आयोग दे अध्यक्ष बी. वेंकटेशम होरें आखेया जे एह सम्मेलन रियासतें दे पी.एस.सी. ते यू.पी.एस.सी. लेई इक मंच दे तौरा पर कम्म करोग ते एहदे राएं सुधारें दे कन्नो-कन्नो सरकारी नौकरियें दी भर्ती प्रक्रिया च दरपेश चुनौतियें ते मुहें पर चर्चा कीती जाग।

<><><><><><>

Asia Cup Cricket Under 19

एशिया कप क्रिकेट अंडर 19-दे सेमीफाइनल च अज्ज भारत दा मुकाबला श्रीलंका कन्नै होग। मैच भारतीय समें मूजब बडलै साड्डे दस बजे शुरू होग। आयुष म्हात्रे दी कप्तानी च भारतीय टीम नै अंडर 19-एशिया कप दे ग्रुप चरण च शानदार प्रदर्शन कीता ऐ।

दूए सेमीफाइनल च अज्ज बडलै पाकिस्तान दा मुकाबला बांग्लादेश कन्नै होग।

<><><><><><>

Cricket

मर्दे दे क्रिकेट च भारत ते दक्खन-अफ्रीका बश्कार 5मां ते अखीरी टी-20 अंतराष्ट्रीय मैच अज्ज अहमदाबाद दे नरेन्द्र मदी स्टेडियम च खेडेया जाग। एह मैच संजा 7 बजे शुरू होग। सूर्यकुमार यादव हुंदी अगुआई च भारत नै फिलहाल सीरीज च 2-1 दी बढ़त बनाई दी ऐ ते ओह दक्खन-अफ्रीका खिलाफ इस श्रृंखला गी अपने नां करने दा लक्ष्य लेइयै मैदान च उतरोग। लखनऊ दे इकाना स्टेडियम च बुधवारें होने आला चौथा टी-20 मैच घनें कोहरे दे चलदे रद्द करी दिता गया हा।

<><><><><><>

Gujarat SIR

मतदाता सूचिएं दी खास ते व्यापक नजरसानी आहले अभियान तैहत गुजरात दी सारी विधानसभा सीटें आस्तै मतदाता सूची दा प्रारूप अज्ज प्रकाशित कीता जाग। जिला निर्वाचन अधिकारी संशोधन प्रक्रिया च पारदर्शिता यकीनी करने आस्तै मान्यता हासिल राजनीतिक दलें दे प्रतिनिधियें गी प्रारूप सूची दियां प्रतियां सौंपडन। शिकायत ते आपत्तियां दर्ज कराने दी प्रक्रिया अज्जै सोयां आधिकारिक तौर पर शुरु होग ते एहजनवरी 18 , तक 2026र चलोग। मतदाता हुन प्रारूप सूची च अपना नां दिखी सकदे न ते नमे नामांकन ते सुधार आस्तै आवेदन जमा कराई सकदे न। चुनाव आयोग नै गैरहाजि- इक थाहरा थमां दुई थाहर चली गेदे ते मृत मतदाताए दियां सूचियां बूथ स्तर दे एजेंटें कन्नै बी सांझा कीती ऐ- जिसदे कन्नै खीरी मतदाता सूचि स्वच्छ ते स्टीक होग।

